

tude 18. & gira 17 degrez de la Ligne au Nord. Il s'y void vne montaigne eleuee de tous costez. Devers la mer & en plein pays elle a esté fort fertile & peuplee d'habitans les plus habiles & industrieux de tous les Insulaires de là autour tant au fait de guerre qu'au labeur. Il y croist aussi de l'or, & des arbres portans fine laine : maintenant elle est pleine de betail qui y a esté apporté d'Espagne & qui y multiplie. La chair de porc y est meilleure qu'en nul endroit. La principale Ville de la dite Isle se nomme Hispalis ou Seville, à cause d'une Abbaye là erigee dont vn certain Petrus Martyr Milanois fort docte personnage a esté premier Abbé lequel a escrit ceste histoire pour la pluspart.

Abondance de betail.

L'Isle Espagnole, ou Haiti.

Divers noms de ceste Isle.

Sa situation.

Ses havres & rivieres.

Deux Lacs.

Abondance de richesse de ceste Isle.

Diverses rivieres qui divisent l'Isle.

LA deuxiesme grande Isle d'entre les Antilles a iadis esté appelée par les habitans Quisqueia, puis Haiti, & Cipanga. Haiti signifie chose rude ou aigue: Quisqueia, grande terre, ou grand monde. Christofle Colomb luy a donné le nom d'Espagnole; & maintenant on la nomme S. Dominicque du nom de la Capitale Ville de l'Isle. Elle fut descouverte l'an 1493. A l'Est d'icelle git l'Isle de S. Jean & diverses autres: à l'Oest Cuba & Iamaica: au Nord les Isles de Canikales: & au Sud devers terre ferme le Cap Vela pres de Venezuela ou petite Venise. Elle contient 350 lieues de circuit, & selon Benzo 400 lieues Françoises. Elle s'estend plus en longueur qu'en l'argeur car elle a de l'Est à l'Oest en longueur 150 lieues, & du Nord au Sud en largeur 40 lieues. Le milieu de ceste Isle git à 300 degrez de longitude, & à 19 de latitude. Elle a plusieurs grands havres & plusieurs bonnes Rivieres, comme Hatibanico, Iuva, Ozoma, Neyva, Nizao, Niqua, Hayva, & Vaqués, toutes lesquelles se rendent en la mer. Il y en a encore d'autres plus petites, comme Macorix, Cibao, & Cotui, dont Macorix est fort abondante en poisson, & les deux autres en or. En ceste Isle se trouvent deux Lacs dont l'un vient des montaignes, d'ou la Riviere de Nizao prend sa source, lequel est inutile & ne sert sinon à donner frayer. L'autre nommé Xaraqua est salé iacoit que plusieurs Rivieres douces s'y viennent rendre & qu'il abonde en poisson, notamment en grandes Tortues & Turbans ou Hayes. Il est proche de la mer & a onze lieues de circuit.

Le quartier maritime de ceste Isle souloit estre fort habité, & y avoit des signalees Salines & des bôs havres: entre autres la Riviere Jaques ou se void vne grande montaigne de Sel. En ceste Isle croist quantité de couleur bleue fort fine, & du bois de Bresil en abondance: des arbres portans laine, dont toutesfois on ne peut faire nuls habits. Il s'y trouve aussi de l'ambre & des riches mines d'or: & y a bonne pescherie es Lacs & Rivieres: Elle rapporte aussi de l'argent & autres metaux: pareillement elle abonde en Sucre & a vn fonds fort fertile. Les Raisforts, Laictues, Choux quinze iours apres estre semez sont propres à estre mangez: les Melons, Concombres, Courges trentelix iours apres estre semez se trouvent meurs & de bon goust.

Ceste Isle est de la forme d'une feuille de Chaistaigne. Par le milieu s'estend vne rangee rude & pierreuse de montaignes ayant la forme d'un dos, nommée Cibani ou Cipangi, d'ou on a tiré grand quantité d'or par cy devant. De là descoulent quatre grandes rivieres qui divisent l'Isle en quatre quartiers, dont l'une s'estent vers l'orient nommée Sunna: vne autre vers l'occident est nommée Attribunicus: la troisieme au midy, a sçavoir Iachem: la quatrieme au Septentrion, Naxbam: là autour se trouve force bois de Bresil, & des Boscages de certaines Espiceries mais non telles que les orientales, lesquelles ils troquent avec d'autres choses, spécialement avec

des